

عبد العزيز بندق

عند أم ترتّر

أشعار بالعامية المصرية

طبعة أولى يونيه ٢٠١٩



عند أم ترتّر

بطاقة الكتاب

عنوان المؤلف	عند أم ترتز
المؤلف	عبد العزيز بندق
التصنيف	اشعار بالعامية المصرية
رقم الإيداع القانوني	٢٧٢٦٨ - ٢٠١٨
الترقيم الدولي	٩٧٨-٩٧٧-٦٦٥٦-٢٧-٧
رقم الإصدار الداخلي	٣٢٠ الطبعة الأولى يونيه ٢٠١٩
عدد الصفحات	٨٤ صفحة
تصميم الغلاف	مؤسسة النيل والفرات

جميع حقوق الطبع والنشر محفوظة للمؤلف، ولا يحق لأي دار نشر
طبع ونشر وتوزيع الكتاب أو ترجمته أو الإقتباس منه أو نشره على
النت الا بموافقة كتابية وموثقة من المؤلف



مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

النيل والفرات nagyegy200064@gmail.com

النيل والفرات alnilwaalfourat@gmail.com

المقر الرئيسي: ج.م.م. محافظة الشرقية - العاشر من رمضان - مجاورة 13 - أمام سنتر الـ 13 - عقار 304



عند أم تترتر

الإهداء

إلى حلمي الجميل
الذي ما زلت أنتظر تحقيقه

عبد العزيز بندق



عبد العزيز بندق

فلسفة التَّنْقُل بين رفض الإنتماء وانتماء الرفض فى شعر عبد العزيز بندق

ناجى عبد المنعم

لعبت قصيدة الرفض دورا مؤثرا فى ثورات الشعوب على مدار التاريخ ، واستطاع كتَّابها من الشعراء أن يغيروا تاريخ أوطانهم ، غير عابئين بدخولهم فلك التمرد والإنشقاق عن النظام ، وقصيدة الرفض تكشف سلبيات وأخطاء الآخر وتضع الحلول ، وترسم حدود الخارطة من جديد - فكيف لمن يكتبها أن يكون متمردا ومنشقا إلا من وجهة نظر أصحاب المصالح فى انتشار الفساد



والشاعر عبد العزيز بندق لم يُسخر قلمه مطلقا للمدح والفخر والرثاء ، ولم يتملق الوصول لسلطة أو منصب قيادى فهو شاعر وطنى منتم لم تخرج كتاباته عن حدود الإنتماء للوطن والتبشير بيوتوبيا جديدة لم نعشها من قبل، فهو يضع فلسفة جديدة للتنقل بين رفض الإنتماء لأصحاب المصالح بطريقة جديدة هى انتماء الرفض ودخوله فى مضامير الدولة من أجل حياة أفضل ، فعندما يكون الشاعر صاحب منهج معلن وفلسفة مقننة لابد أن يكتب من وحي ضميره الوطنى ،

وهذه التجربة الجديدة (عند أم ترتر) والتي قدم من قبلها (من بلاد العرقسوس - وطن للبيع - لوجين) تدخل جميعها فى مشروعه الإبداعى الذى رسمه بدقة متناهية وقدمه لا يبتغى من ورائه إلا الإبداع الجيد ، فاستخدم قاموسه اللغوى الخاص جدا به ، على حدة ألفاظه وتهكمها وسخريتها من الأوضاع الراهنة ، غير مبال بمقصد الرقيب أو غيره ، فعزى أمر الوطن كله إلى (أم ترتر)



التي صارت مضرب المثل في وطن الضائعين والتائهين قلن
يكونوا إلا عند أم تترتر .. واستخدام الشاعر عبد العزيز بندق
للميثولوجيا والإسقاطات التاريخية والترميز أضفى جمالا
ورونقا على قصيدة الرفض فصارت من جماليات الانتماء
للوطن ، وصنع من خلالها ردا أكاديميا لا يخلو من فورة
المشاعر وأقر أن قصيدة الرفض هي السلاح الوحيد المؤثر
، وهي القلم الراسم لسياسات الوطن ، وفي النهاية نحن أمام
شاعر كبير ، وكتاب قيّم جدير بأن يحتل الصف الأول في
المكتبة العربية .



عند أم ترتر

عند أم ترتر ..

هاتشوف ديوك البرابر

شاربه الهوان والمر

وان كنت حر

تعالى خلصهم

من إيد إيهود ألو اسماعيل

أو حتى من إيد إبراهيم



أو اشتريهم بالفلوس م الشيخ علي
لاجل المواحي تنجلي
وتخربط الصاجات على وسط هنومه
يا إما خلاص ..
ما عادش خلاص
قايم لنا قومه
ماتسيبش خيلك في الخلا
وتدي ضهرك للخسيس
وتشد حيلك ع الديوك اللي اختفت
النور خفت
والليل على وش العمى



واللي اتعمى ..
قلب السواد اللي اتزرع
جواك سنايك شك
طرحت شكوك
في ضميرك الميّت
سيّت الديوك بالخبت والحيله
تُنت فوق سطح البرابر عند نفّوسه
بعد الصاجات ما اتوزعت ع الرقصات
مع خارجة الميّت
وعملت مش فاهم ، غبي
وسيت علوان الخسيس
ياكل في مال النبي !!



المصيده

اسحب دماغك ..
من بين سلوك المصيده
وابدا حياتك في الزمن
واعطي الدموع الإذن تروي ..
خودك البور الشراقي
نيم جروحك في المسام ..
لِمَ الوجع



وأيّك تلاقي الخوف بخوف

الرحله صعبه ومتعبه

والغربه عطشانه البكا

والآلم كثير متشعبه

وان يوم خذك شوقك ..

لأيام التلاقي

والقعهه تحت التوته ولصوت السواقى

والأرض والمحبوب وأيام الهيام

ارمى الهوان بإيديك بعيد

وان تعبت الايدى م الجديد ..

ارميه فى قلب المصيده



وبلاش تقول وتعيد
وتغني جرح الكان وكان
وتسلم الوسواس مقاس وجعك ..
وتستسلم
وتعطي الدهر مفتاح الآلام
وان جات في يوم الريح عتيه
ابقى انحني
وارفع دماغك بعد ما تعدي بسلام
وان حاربتك لايام
طبطب عليها وخدها في حضنك ...
ونام



ولاد الشيطان

حنت كفوفك واتحنيت ..

تحت السيوف .. مكسوف

مع إن عمرك ما اشتكيت

ظلم الغبي .. والفيلسوف

يا مُخزّنه ..

دانا كنت فاكر اننا ولاد النخيل

آدم أبونا وحوّا تبقى أمانا

شادين علينا السقف .. والسقف السما



ومحوّطنا بالأمان
لكن تأكد إنّنا ..
ولاد الشيطان
بلاش ترميني يا شمسي
على شط العدا مجروح
أشّق ف ليلي من ياسي
الاقبي فجرنا مدبوح



لونج مارش ١ + ١

لو كنت عايز ..
تمنع الشمس الجريئه ..
إقفل بيبانك
وادخل سراديب
الهوان المستباح
لما اتفرط عقد البكارى
ف شينعا والرشراش
وفي الجولان وفي الضفه



وطنب الكبرى والصغرى

واياك تحاول

تحرق الحرف اللي نور

دنيته

أو تعتقد إنك هاتقدر ..

تعكس النيل والرياح

الخط ماشي

في اتجاهه المستقيم

مهما ارتفع صوت النباح

وانا أصلي كائن ..



ماليش في اللك واللوكلوك
والهري والهرتله
وبحب احل المسأله
على قبة المشاوير
وبالملم المسافات ..
وباقصر السكه
لا بحب اجمل واجود
ولا با شتغل ترتيل
دايما باجيب م الأواخر



وباقطع المواويل
واحد وواحد
يساوي في
الحساب اتنين
والخيه عنصر وراثي
وفي الحساب
اتنين
والوكسه علم البطايق ..
وفي البطاقه اتنين
والكذب داير بلدنا ..
رهوان وله رجلين

وقول وضاعف وزيد
حتى تصل ألفين
والكلب سعره ارتفع
وصار يساوي م البشر
..ألفين

والقلب فارد جناحه
ومرففه الأوجاع
ونظمي سالت ايديه ..
وكل شيء اتباع
من لونج مارش ..



لثرك سات
رقص السكات
على بسطة السلم
حتى الجينات اتغيرت
..واتفسرت ..
ويّاها أحلامنا غلط
والمختلط ..
في الشك مزروع اليقين
ولو دخلتوا
في المعادله



وقریتوا اطراف
لإكتاب
هاتلاقوا قاعده
بدون مجادله
موجوده عند الأمريكان
في صفحه أولى
من كتاب علم الغياب
واحد وواحد في العرب ..
بيساوي صفرين
في الحساب



سبع تلاف مر مطه

هاتدوروا مش هاتلاقوه ..

بين الحجاره والحصى

وان تساله لازم تتوه ..

بين الأفاعي والعصا

احنا اللي عشناها ..

قلعتوا توب المروءة

ورضيتوا تمشوا عريانين

بكرامه ضايعه ..

وهيبه ضايعه

وعيشه مايعه ومطحونين
هاتعيش تطاطي ..
وتموت تطاطي
تحت الجزم ومسحولين
انفض تراب الذل
عن راسك وقوم
العمر ماشي كأنه يوم
موت وانت واقف يا أخي
أحسن ماتبقى عايشها ..
عريان م الهدوم



موت وانت
واقف يا أخي
أحسن ما تنداس بالجزم
وبرضه هاتموت بالسموم
ساعة خلاصك جايه جايه
بأي شكل وف أي يوم
جرّب تلف كتافك العريانه
من توب الكرامه
جرّب تطوّح من ايديك
كاس الندامه

جرّب تعافر..
وايّاك تهاجر..
أو تسافر
وتسيب خسيس..
يقطع على ولادنا الهدوم
وانطقها مره واحده لأ
وان شقوا لينا ١٠٠٠ شق
إنطقها صرخه
بعلو صوتك
قولها لأ..



و ١٠٠٠ لأ
يا نعيشها عزّه
وراسنا فوق ..
يانموت ب لأ ..
وراسنا فوق
وساعتها دنيتنا الغيبه ..
هاتشوف ضلام الليل ..
شروق



إحنا العرب

إحنا العرب واحد
وما فيش ما بيننا حدود
ولا قلب كان جاحد
ولا غضب وصدود

ف ان جيت أزور الوطن ..
عدوني ببطاقتي
لا تقولوا هات باسبور ..
ولا تحرقوا طاقتي



وان كان على حدودكم
إنتوا اللي حاطينها
وانتوا اللي بيعتوا البلاد
بهواها وب طينها
واللي مكذبني
يسأل .. فلس .. طينها

My Heart

Tomorrow

غداً ماتفكريش

Will meet again

وماتسألش

Where you go

ولا جاي منين

ما خلاص يا ست الحسن ..

عَدّني



وعِدِّي فِ عِدَادِ الْمَوْتِ

وانسيني

My heart

مات

أنا قلبي كان ملعب

وانتي اللي هدّافه

بس الحكم مرتشي

ما حسيش أهدافه



حمّلت قلبك أمانه
إبقى افتكّرني بخير
دا الحب أجمل أمانه
ممکن يشيلها الطير
أنا قلبي كان هدّاف
وانتي بلاي ميكر
نعمل ثنائي خطر
لو شيلنا لسبيكر



أنا قلبي كان عصفور
أخضر ويغني
ولما جاله الدور
خطفه الحقود مني



جاتها خيبه

بتدوروا على إيه ؟
والجرح أدامكم
مادد بطول النيل
وبتسألوا على إيه ؟؟
يُفْك أيامكم
والطرح كله عويل
كل العقول اتنفضت
والجهل صار زايد



والصحه راحت في كُحّه
والمرض .. زايد
والفقر زاد وانتشر
والخوف بقى زايد
وجاتها خيبه اللي عايزه
م الخلف ...
زايد

اتنين × تلاته

من بين ضلوع البحر

طالع للخلا

ماسك في إيدي الأسأله

ومذاكر السبعه العجاف

اتنين × تلاته بستاشر

كفين في جدول ضرب

معدوم الملامح ومالوش أمان

سايح في بحر الوهم



عالم البشر وكأنه فيروس انتشر



الضرب تحت الحزام

لو ضربتك
في الحزام
ياريت ماتزعلشي
ولو ضربتك
تحت منه
إفهم ضربتك ليه
وان كان دماغك زلط



بالجهل متعبي
ف الذنب ذنبك يا غبي
خلافي معاك
ماهوش معناه
اكون خاين
ولا مأجور ومتموّل
خلافي معاك
على المبدأ ..
من الأول

المشي في الحيطه

مشينا جنب الحيطان
وقالوا مش عايب
ودخلنا جوا الحيطان
وبرضه مش عايب
وان مدُّوا أيدهم
في جيبنا



لازم نقول عاجب
ونظمي سالت ايديه
وماشي يتعاجب
واما لقيته اتنفخ ..
ف شكيتہ للقاضي
ابن اللثيمه طلع
منفوخ على القاضي
إمتى الألم هازول
والجرح فينا طويل
وعميق مالوش يخر



وواخذنا جيل ورا جيل
قولنا الكلام وانكتب
ع الشعر وجبينه
وقولنا نخرج بقى
م الكذب وسنينه
واكلينها والعه ومرهم
إحنا اللي شاربينه
دانا اللي يوم جيتلكم
فارد جناحاتي
طالب رضا قلبكم
بعتوني للحاتي



لو كنت رقاصه

لو كن رقاصه ..

كانوا فتّحوا

الأبواب

ورقّصوا الأسدين

واترصوا ع الجنين

وطلعوا المايه ..

م النهر ع الشطين

ترقص بصاجاتها



والاحتفال شهرين
وتحت رجليها
تتسقط الشنابات
طاليه الرضا وتبات
تلحس فس رجليها
وشيروا الخبر
في ثواني ع الملايين
ورشّقوا البودي جارد
عند السكن صفيين



واذاعه ، راديو وجرأيد
ومصورين ألفين
والكل يأخذ لقطته
في ثواني على صفحته
في الميديا يتباهى
ما احنا اللي جواها
عاشينها في بلاهه
نعشق سنين
مسخره
وتاخذنا نذاهه



نمشي وراها
بعبط
في الأرض وسماها
لكن عشان شاعر
كل الشعور
ماتت
بنحب موت الفشل
ونموت الفالج
ونهد في الصالح
وبنرفع الطالح



وحتى بكرة اللي جاي
منسوخ من امبارح
ربك خلقها كده
غرقانه في المالح



المنصوره

لو اتتي حوريه م الجنه
ومتحنيه بالحنه
وعندك لولي كام سنه
مانيش دايب في دباديبك
ولا ماسك تلايبك
دا أدهم ولد شرقاوي
وانا الشاعر دقهلاوي
من المنصوره والعزّه



في عز الحزّه والجزّه
لويس اتربي بإيدينا
وقولنا وعِدنا وإدّينا
فرنسا ..

درس في الأخلاق
بعتنالهم لويس أشلاء
مُنْكَس .. عينه مكسوره
وعيشناهم الأجواء
وسمّعناهم الأنباء
وشاف العالم الصوره



وعرفناهم الفرقين
ما بين النار وأسرارها
وبيّن الحنه في الجنه



عبد العزيز بندق

إنطق

إنطق يا ناجي وقول
إرحمني يا بن أمي
مين اللي أوحى له
بالشرب من دمي



اوحى له صاحب سوء
كاره لأي نجاح
يقتل ويدفن علم
راكب حصانه وصاح



لَقِيَ الرَّحَايَا

مِين اللّٰي قَالُوا اَنَا ..

حَبَّةُ غَنَمٍ

مَالِنَاشٍ وَجُودٍ

مِين اللّٰي قَالُوا اَنَا

حَبَّةُ زَبَالَةٍ

فَ كَيْسَ بِلَا سَتِيكَ

خَلَفُوا عَ الْأَرْضِ دُودَ

- وَأَنَا أَقِيمُ بِدَاخِلِي

كل الشعائر
وأمارسُ الإيمانَ خلسه
وأصلي فرضي
بالفؤادِ وأكتفي
كي لا يقرُّ بأنني :
من بين رواد المساجد -
زرعوا الدوايب
في الشوارع



والبيوت
وفي المقاهي
والمعابد
- سرقوا الصناديق يا محمد
وخذوا المفاتيح ويّاهم -
- ولذا أبيتُ تصرّفي
وتطرّفي
ورفعتُ وجهي للذي ..
رفع السماء بلا عمد -
بس اللي باين مُعتمد
ختم الشعار



والمهنة والدين شقّروه
والباقي - في شريط - مغنطوه
مافضلش غير
رقم العقار
والأسم لما ل سلسفيل
جد الجدود
واضح نهار
وكفايه أحسن يسمعوك
أو يحسدوك



متعلقين خلف الستائر
ع الحيطان
وجوه قطن المرتبه
حتى السنين مترتبه
حسب الحروف الأبجديه
ف كشف عيله
مُسببه
وكله من بند الأمان
والاحتياط

واجب رباط السلسله
وايدينا ف ايدين الوطن
مشطور ..
وتام ..
ومُجتزأ
منهوك ..
وتعبان م الزحاف
ومن العلل
والفزاعات والأخونه
ومن ملا عيب الشيطان



والغصب ..
معجون السنان
فاستحملوه
وهما مين دول اللي قالوا
اننا حبة غنم
مالناش وجود
مين اللي قالوا إننا ..
حبة زباله
ف كيس بلاستيك
خلفوا ع الأرض دود

أبو العربي
إحنا اللي قولنا ..
بدال مانمشي ع الرصيف
جنب الجيطان
عشان ابوك
وامك
واخوك
والعيله وسنين بهدله
لأ نمشي جوا
في الحيطان



واهو أخذ بالأحوط .. امان
قولنا اللي نايم .. قَعْدوه
قولنا اللي قاعد .. وَقْفوه
والمستريح .. عَذِّبوه
والواكل أبقوا جَوِّعوه
والشارب أبقوا .. عطَّشوه
والعائش ابقوا .. موتوه
والميت ابقوا .. موتوه
وان شفتوا تايه بين وبين



عند الحدود ..

إبقوا اقتلوه

أو خللوه

وان دمه تايهه وبنت دايله

كسرت إشاره ع الحدود

إبقوا اسحبوا منها الرخص

وخيروها ما بين وبين

يا إما تجري تشيل زلط

يا إما تمشي في الغلط



مملكه

قرفصتنا ..

سخرتنا

رصصتنا فوق بعض

أكوام م العبيد

وطلعت فوق

جتتنا لما للسما

زي الهالوك



إعلنها وإخلص مملكه
مش باقي غير تاج الملوك



عبد العزيز بندق

شاكي باكي

كسرينا واسحلينا
وادهسينا واهرسينا
وافروميننا .. شاكي باكي
دا المنفى مش غربة قدم
المنفى صمت الأفئدة
والأمكنه

اللي اتبدر شوكة خرس
والأزمنة
اللي اتخطف خوفها حرس
المنفى سكة عاشقين
ضلت عنوانها الفرس



أنا فلبى زي الحليب
والنيّه صافيه أوي
وزي ما بتطيب
بتفور وتحرّق أوي

خد الكلام مني
وافهم معانيه
هاييجي يوم عوزه
لما تعانيه



أنا قلبي أبيض وصافي
وبحب كل الناس
لا بحب كُهن وعوَج
ولا شغل ناس انجاس
أنا أصلي زي امي
ماحبش الدوران
وزي ابويا عِدل
ماحبش التوهان



ربي عليك العوض
وانت اللي بتعوّض
والحمد ليك واشكرك
على كل ما اتعوّض
ربي يقطع ويوصل
الحق لاصحابه
وعمره ما ينضر
من دق على بابه

ما فيش غيرك

في عز الليل
وقلبي بينتفض مني
تطوف روحك
تداوي جروحي
وتطبب
على سنين الوجع
وتنام



وترسم ضحكك

غنوه

تخفف قسوة الأيام

يا بلسم روعي وجروحي

دا مهما تغيبني وتروحي

ومهما يهد – قلبي – النوح

مافيش غيرك ..

حبيب الروح



القضية

القضية ..

مش قضية قلب حبك

وعاش عشانك ..

ضحى ليكي

وانتي لابسه

توب غباوتك

غلك الأسود

عميكي



دا اللي ضحى كثير
عشانك
واللي سخر
عمره ليكي
لو فضلتني ف توب
ضلالك
جايله يوم ..
ويضحى بيكي



لاجل الورد

لو كان حبيبك عسل
ماتلحسوش كله
وان كان معاه البصل
إضحك له واغزل له
واجبر بخاطره ..
ماتسيوش في الضيق
دا قالوا لاجل الورد لازم
يتسقي العليق



الطبع غلاب

لا مركب التايه تلاقي ..
ع الشطوط مرسى
ولا منفى ..
خلاف المنفى جواكي
يا أرض طارحه القلق
ومغربه الأحباب
طول عمر ديلك عوج
والطبع كان غلاب

قلبي حبك غلط

انا قلبي حبك غلط
بس الغلط مردود
واللي اتكسر يترمي
أحسن مالersh ردود



الكذب سكة جهلك الواضح
والفعل فاضح
وانتي السؤال اللي اتحذف
وبدون أسف
من صفحتي
الغل عندك أصل
مش فرعين وبس
نقصك وحقك ،
قلبك الأسود
أصول متشعبه
والرحله كانت مُتعبه



لعبة الناس الغلابه

لو رحت تلعب
لعبة الناس الغلابه ..
لازم تخاف
وتكون حَذِر
هما اللي عايشينها مثل :
إيش تاخذ الريح
م البلاط
اليأس قوتهم ..



والغطا إحباط
ومن النهارده باحدرك ..
إلعب بعيد
أو حتى روح اللعب
مع الناس اللي زيك -
قتالينا الحلم
في وشوش البشر
إلعب بعيد
واحذر من الكسر
اللي فات

ما تدوسش رجليين
اللي ناموا
في الخلا
العريانيين
الشقيانيين
التعبانيين
العرقانيين
اللي الزمن ..
علم على وشوشهم
بأختام الشقا



إلعب بعيد ..
واتعلم الدرس
اللي فات
واحد ÷ اثنين
ما يساويش
رُبْع اللي مات
فاحذر
وحاذر
وافتكّر
عند المقام



ياروح مابعدك روح بقى ..
هاتساوي كام



عبد العزيز بندق

حرف سين

عديت لك في
بحور ومحيط
وعشقتك
يا حروف السين
لغلت دروبي ولفيت
وارتاح القلب المسكين
فوق شط
حروفك حطيت



دوّبت عيونك
ف عيوني
عديت لك
في بحوري وجيت
مرجحتك
يا حروف السين
فوق بحر
العشق المتعالي
في ضلوعي
وفوق موجي العالي



غنيت لك
مليون موال
نيمتك فوق
كفة ايدي
غطيتك برموش العين
وسقيتك شهد
ف يوم عيدي
وبصوتي العالي
فضلت انده
اترجى ف مولايا
وسيدي



يوصل لي
حبالي المقطوعه
ويحقق حلم الاتنين



عبد العزيز بندق

بحر الهوى

عود الكلام اتعوج
والحرف تاه وياه
لف ف حوارى البلد
دور عليه ف لقاءه
غرقان في بحر الهوى
جنب الخروف والشاه



مش مسامح

ربي اللي بيخلص ..
حقوقي من ناسها
شايف بعيني المرض
بيذل أنفاسها
ومش مسامح يارب
كل اللي ظالمني
واللي استحل الحرام
وظلمه يألمني



ف رفعت وجهي إليك
إنت اللي تكرمني



عند أم ترتر

على كتف بندق وناجي

إحنا اللي شيلنا الرصيف

على كتفنا سنوات

ورسمنا صرح القاهره

ورميننا فيه أساسات

على كتف (بندق وناجي)

بالضحك والاهات

سفلتنا كل الطُرق

ناعمه بلا مطبات



وزرعنا بذرة امل
طرحت لنا عمارات

مليانه شعر وادب
قول يا زماني وهات
واحكي الحكايه بأدب
عن (توأمك) روايات



كلام الناس

كلام الناس
مالوش آخر
ولو هاتمشي وراه ..
مشيِّك مالوش آخر
ف دوس عليه
بجزمتك
وهاته م الآخر
طول عمري



عارف سگّتي
وماشيها ومرگّز
لا شغلتي نفسي
بتوافه
ولا بكلام الناس
ولا واحده قالت
وعادت
ولا شحط قال ع الناس
ولا بغل ماشي وساحب
في لسانه سيرة الناس

ولا عمري خدت الخسيس
ولا العويل صاحب
ولو مش ابن أصول
عمر ما هاصاحب
كبرت عقلي وراسي
خدت الكبير صاحب
والغالي ادوسه بمداسي
لو للحقير .. صاحب



مسرح الأوهام

عشان القصه مكتوبه

بايد كاتب

ماهوش فاهم

خيوط السرد والحبه

فلازم تقفلى المسرح

يا إما تشوفى لروايتك

بطل غيرى

يقوم بالدور بدل منى



وبكفایه
تلفی وتجرى وتدورى
لأنى بجد مش غاوي
أمثل دور
ماهوش دوري !!..



غريب فى حضن امي...!!

يا أرض فاطمه الولاد
ع الشرب من دمي
توب الخصار اتحرق
ما فضلش غير همى
فارد حدود الغرق
والشمس مدبوحه
فوق السطور ع الورق



والضحكه مبحوحه
محتاره جوه القلق
مخنوقه ف حصارك
لميت حروف الأمل
قطعها منشارك
دبلت عيون البكا
والجفن داب مني
واتكتفت روعي
ما عرفت كام سنى
ثوهنى ليل الملل
في قلب احضانك



إبليس معشش هنا
بور لي فداني
أشكي لمين يامه
والأرض مخنوقه
دوب هدومها العطش
ودماغها موبوءه
توب الأمان اتحرق
والنور أمل فاني
جوه البطاقه اتمسح
إسمي وعنواني...!!



إنتحار اليأس...!!

في عز الليل تغازلني

جفون النوم

أحاول منها اتهرب

تعلقني

إيديين الشعر

واقلامي

في سقف السهره

واتكهرب



أجمع كل أشلائي
بكل العزم جوايه
وكل ما فيا
من قوه
أقوم اجري
وأتخايق مع نومي
واعدي الظلمه فوق ..
ظهر القلم أشعار
يدوب الليل
في إصراري
واشوف الكون



على سن القلم ...
أوراق بتقلب
في أحباري
خلية نحل دواره
مع صورتك
على دخان ...
معدني فوق
سمايا وكان
نفسي مخنوق ...
وعبارته ف سكون الليل



تشق البحر
في سطوري
يدوب الليل
في أنوارك
على سيجاره
تولع تطفي تحرقني
تدوبني في شفايفها
وشايفها
تقرب مني تخذعني
تعديني على حفره .
غريقه في قش متكاهوم



وبتقاوم
كيما القش ملعوبك
وتمنعني أخطيها
وادوخ والدوخه تفقدني
توازن عقل متحير
علي صراعات في جوايا
تياسنى...!!
أحاول أمر
م الأزمه
واعدى الصعب
واتشاهد



وابات شاهد
في أوراقي
علي الأحداث
مع نفسي ولما اخرج ...
من التوهه
والاقي وجودي
في الصفحه
يدوب ياسى ..!!



رحله فى محيط العيون !!..

أدخل في قلب الأرض
واتنفس تراب
وانفض هدومي
واستحمى بفرحتي
واعشق بهيه في نظرتك
واسرقها ...
من إيد اللي عشقوا ...
قبل مني وجربوا
قصه ياسين !!..



عجبيات بندقية

عجبي عليك يا وطن

لما العفن والعطن ...

يمسك شخايلك

يدخل نهارك فى ليك

وتتوه كما الأيتام ...!!!



والكلب ينهش فى لحمك
ويخش عضمك فى شحمك

والضلمه تكتب طريقك
والذل يصبح صديقك

وتلعنك لايام...!!!..
عجبنى عليك يا وطن
عجبنى عليك .. عجبنى...!!!..



لو ...

لو كان مكان قلبك حجر
يبقى ابتدى شجر الخريف
يرمى الورق ...
على صفحه عدت من نهار الإخضرار ...!!..
والشمس حطت فوق _
مراكب من ورق
على دوامات الرمل _
فى الشط النشار ..



عند أم ترتز

وساعتها لازم تفهمی ...
إن الهوا میل حصان الارتكاز ...!!..



عبد العزيز بندق

أنا مصرى

من أرض مصر العاليات
وجدودى صنعوا الأهرامات
وبنوها من عرق الآهات
أنا نسل فرعون _ الزمان _
ميت على اديهم ..
وقاموا حنطوه ...!!..
والكهنة واقفين يحرسوه ...!!..
أنا ابن مينا وأحمس الأول ...



وحامى البوابات
ولا عندى حد ف مصر مات
من خوفو خفرع منقرع
ولحد ابو الهول انتباه اه
_ خلافي معاك ماهوش معناه ..
أكون خاين ولا ماجور ومتمول
خلافي معاك على المبدأ من الأول
أنا مصرى _



وزى ماسمعتك هاتسمع ...
وهاتعترف وتقول آمين ...!!..
وتقر .. إنى مصرى زيك _
من بلاد محروسه من _
رب البشر والعالمين
دانا مصرى مصرى
من نسل خوفو وخوفه _
..... وصلنى المطار
وادانى تأشيرة السفر
ومنحنى صك الخالدين ...!!



أحييه

أنا ابنك يامه والمصحف
ورضعتي من صدرك ...
عذاب وتراب
شربت الهم من ويلك
وعشت سنين مواويلك
وباسهر ليلي اغنيك
صدوق الوعد .. مش كداب
ولما ازهق أو اتنقرز



واقول أحبيبييه
باقولها لاني مش عارف ..
بحبك ليه ..؟؟!!



محتوى الكتاب

بطاقة الكتاب	٢
التصنيف	٢
الإهداء	٤
فلسفة التَّنْقُل بين رفض الإلتواء وانتفاء الرفض فى شعر عبد العزيز بندق	٥
عند أم ترتتر	٨
المصيده	١١
ولاد الشيطان	١٤
لونج مارش ١+١	١٦
سبعنلاف مرمطه	٢٣
إحنا العرب	٢٨
My Heart	٣٠
جاتها خيبه	٣٤
اتنين x ثلاثه	٣٦
الضرب تحت الحزام	٣٨
المشي فى الحيطه	٤٠
لو كنت رقاصه	٤٣



- ٤٨ المنصوره
- ٥١ إنطق
- ٥٣ لقي الرحايا
- ٦٣ مملكه
- ٦٥ شاكي باكي
- ٧٠ مافيش غيرك
- ٧٢ القضية
- ٧٤ لاجل الورد
- ٧٥ الطبع غلاب
- ٧٦ قلبي حبك غلط
- ٧٨ لعبة الناس الغلابه
- ٨٣ حرف سين
- ٨٧ بحر الهوى
- ٨٨ مش مسامح
- ٩٠ على كتف بندق وناجي
- ٩٢ كلام الناس
- ٩٥ مسرح الأوهام
- ٩٧ غريب فى حضن امي!!
- ١٠٠ إنتحار اليأس!!



١٠٦	رحله فى محيط العيون ..!!
١٠٧	عجبيات بندقية
١٠٩	لو
١١١	أنا مصرى
١١٤	أحييه
١١٦	محتوى الكتاب

